

25. oktober 2000

UKA 2000/28

Tipsernermit lottornermillu iluanaarutinit agguaassisarneq pillugu Inatsisartut inatsisissaattut siunnersuut

pillugu

siunnersuutip aappassaaneerneqarnissaanut

Inatsisartut Kultureqarnermut Ilinniartitaanermullu Ataatsimiititaliaata

ISUMALIUTISSIISUTAA

Inatsisartut Kultureqarnermut Ilinniartitaanermullu Ataatsimiititaliaat suliarinninnermi ukunin-nga inuttaqarpoq

Inatsisartuni ilaasortaq Olga Poulsen (IA), siulittaasoq

Inatsisartuni ilaasortaq Per Berthelsen (S)

Inatsisartuni ilaasortaq Augusta Salling (A)

Inatsisartuni ilaasortaq Ruth Heilmann (S)

Inatsisartuni ilaasortaq Mogens Kleist (K)

Tipsernermit lottornermillu iluanaarutinit agguaassisarneq pillugu Inatsisartut inatsisissaattut siunnersuut siullermeerneqareermat Inatsisartut Kultureqarnermut Ilinniartitaanermullu Ataatsimiititaliaata siunnersuut, oqaaseqaatitai ilanngullugit, misissuataarpaa.

Tusarniaanermi akissutit avataaneersut tamaasa, kiisalu tusarniaarnermi akissutit Naalakkersuisut pisortaqarfinit pissarsiarineqartut ataatsimiititaliap siunnersuummik suliarinninnissamini atugassamisut pissarsiarai.

Ataatsimiititaliaq siunnersuummut imaattunik oqaaseqaateqassaaq:

Inatsisartut inatsisaatigut siunertarineqartooq, tassalu tipsernermik lottornermillu iluanaarutit suliniutinut tamanut iluaqutaasumik siunertaqartunut, agguariaatsit naalakkersuinikkut aalajangiunneqartut ersarissut aallaavigalugit, agguanneqartarnissaat aammalu aningaasat siunertanut

taakkununga atorneqarnissaasa qulakkeerneqarnissaat, ataatsimiititaliap tamakkiisumik isumaqatigaa.

Ataatsimiititali Kalaallit Nunaanut atugassanngorlugit ukiumoortumik tunniunneqartartunik agguaaassisarnej sukumiisumik oqaluuseraa, minnerunngitsumillu tipsinik lottonillu tunisinermi ukiumoortumik iluanaarutinit nunatta pissariarisartagaasa annertussusaat oqaluuseralugu.

Inatsisissatut siunnersuummi takuneqarsinnaavoq timersornermut immikkoortitat tamarmiusut tipsernermit lottornermillu iluanaarutit 59,1 %-erigaat. Siunnersuummut nalinginnaasumik nassuiaatini oqaatigineqarpoq 1998-imi 1. julip siornanut sanilliullugu tamanna qaffariarnerusoq, tamannami sioqqullugu timersornermut immikkoortitat tamarmiusut tipsernermit lottornermillu iluanaarutit 40,7 %-iinnarisimavaat. Ilanngullugu oqaatigineqarpoq qaffaanermut pingaarnertut pissutaasoq tassaamat immikkoortitanit taakkuninnga timersortartut innarluutillit utoqqaallu pissarsitineqarnissaat aamma qulakkeerneqartussaamat, soorluttaaq piukkunnaatillit pikkorinnerit timersortartunut agguaanneqartartut, ilaatigut angallannermut aningaasartuutit annertungaatsiarnerat pissutigalugu, qaffanneqarsimasut. Ataatsimiititaliamit pitsaasutut isigineqarpoq innarluutillit utoqqaallu timersornerata, taamatullu piukkunnaatillit pikkorinnerillu timersornerat immikkoortitanit pissarsitineqarnissaasa inatsisissatut siunnersuutikkut qulakkeerneqarnerat.

Timersornerup tungaatigut allatigullumi nunarsuup sinneranut saakkiartuaarneq nunatsinnut sinniisuullutik angalasut angalanermut il.il. aningaasartuutaasa annertunerulernerannik kinguneqarpoq. Taamaattorli Naalakkersuisut agguaaassinissamut siunnersuutaat imaattoq ataatsimiititaliamit taparserneqarpoq; 1) 50 %-it timersornermut tamanit peqataaffigineqarsinnaasunut, innarluutillit utoqqaallu timersornerat ilanngullugu, 2) 9,1 %-it piukkunnaatillit pikkorinnerillu timersornerinut, 3) 13,6 %-it meeqqat inuusuttullu pillugit siunertanut aamma 4) 27,3 %-it tamanut iluaqutaasumik siunertanut allanut, taakkunani ilaallutik kulturimut tunngasut, innuttaasunik qaammarsaaneq, nappaatinik akiuiniarneq pinaveersaartitsinerlu, inooqatigiinnermut tunngasunik siunertat, asimiititsinissamik siunertat aammalu tamanut iluaqutaasussamik ilisimatusarnerit.

Ataatsimiititaliamilli Naalakkersuisut sakkortuumik kajumissaarneqarput Danmarkimik isumaqatiginniarnerit aallartinnissaannut, tamatumani siunertarinqassalluni ukiumoortumik sinneqartoorutinit nunatta pissariarisartagaasa, maanna 0,9 %-imik annertussuseqartut, qaffaavigineqarnissaat.


Isumaqatigiinniarnerit taakku nunatta sinneqartoorutinit pissariarisartagaasa qaffanneqarnerannik kinguneqassappata ataatsimiititaliamit inassuteqaatigineqarpoq agguaaassivigineqartartunut sisamaasunut, siuliani taaneqartunut, agguaaasseriaaseq nutaamik nalilersorneqaaqqissasoq. Timer-

sornerup nunarsuarmioqatigiinnut sammigaluttuinnarnerata kingunerisaanik, taakkununga agguaanneqartartut qaffaavigineqarsinnaanerannut periarfissat immikkut nalilersorneqartariaqarput. Nutaamik nalilersuinermi kultrimut tunngasunut, soorlu isiginnaartitsinernut nipilersornernullu, agguaassissutaasartut qaffanneqarmissaannik pisariaqartitsineq ilanngullugu misissorneqartariaqarpoq.

Tipsernermit lottornermillu nunatsinni kaaviiartinneqartartut annertusigaluttuinnarput, paasinarsisimavorli aningaasanoorneq annertuumik pitsaannequtaasunik nassataqartartoq, tassa ilaatigut aningaasanoorneq pinngitsoorneqarsinnaajunnaartarsimalluni (ludomani). Ataatsimiititaliap nassuerutigaa ludomani nappaataasoq, naalakkersuinikkut suliaqartuusugut iliuuseqarfigissallugu pinaveersimatissallugulu akisussaaqataaffigisarput. Ataatsimiititaliamili amerlanerussuteqartut, tassaasut Siumut, IA aamma Kattusseqatigiit, isumaqarput ajornartorsiut taanna inatsisissatut siunnersuummut matumunnga, nalinnginnaasumik agguaanneqartartunit ludomaneqarnerup akiorniarneranut immikkut aningaasaliissuteqarnikkut, ilanngunneqartariaqanngitsoq.

Ataatsimiititaliaq isumaqarpoq ludomani ajornartorsiutaasoq pinaveersimatinneqarlunilu katsorsarneqartariaqartoq, taamaattumillu inassuteqaatigineqassaaq pinaveersaartitsinerup iluani kontomik immikkut pilersitsisoqassasoq, tamatumani siunertarineqassalluni ajornartorsiummik akiuiniarnissap pimoorusaanerusumik aallartinneqarnissaa.

Taama oqaaseqarluni ataatsimiititaliap isumaqatigiittup inassuteqaatigaa tipsernermit lottornermillu iluanaarutinit agguaassisarneq pillugu Inatsisartut inatsisissaattut siunnersuut maanna ilusimisut iluseqarluni Inatsisartunit suliarineqassasoq.




Olga Poulsen


ataatsimiititaliami siulittaasoq




Per Berthelsen



Ruth Heilmann



Augusta Salling



Mogens Kleist